

Polgo Si Wali Pas Tesalonaika Dabeba Aseani

Hasia nedebo tau sabo po

Te bidi Pol te Korin moni hanude bidibadi tama agai te hasia wali pas deli te Tesalonaika hani we bidibolo aseña tolali. Tama te pas sela pali bidi nosali ma asama, tama agai Polbolo te Tesalonaika bage tomode pedalali se po wagasali. Bidi mebago geda muyu, tama te Krai agai polo e toba ma asai dao po wali, tama te pogo gasa we bidigo homu dolama, tama augwaligo augwa digi tau sabo se tagalama olo bidali. Te Tesalonaika hanude bidibo Krai po wali pabo we bidi dabego homude subo te tiwai yali. Te Krai ma asobo sogo mena se mu pedalugowe tama homu yali. Te bidi mebago te po weyu, te Genuai Bidi asobo sogo te pedelalio tama po obaso, te bidi Pol dali Sailas me Timoti, augwali sela bidigo te hani bage augwaligo homu dodolobo po weyu, te si wali pas aseai dao. Polgo te tiwai po weyu, te sogo pedalube dao, wali. Hasia bolo te we bidi dabego dwai hagoma mu eyu, te tobage dwai kolesaga umagi elama bomo yai mu pedelaibao. Tama te bomo yai po bolama sela sabo bidi me deli pedelama, tama agai Krai ba boi bidi mu yaibao. Tama te sogo te boi bidi dabego te Krai sogo po wali pabo we bidibolo dene dali sege dali si mabo po, te me Polgo odali. Tama tibaso, agai e pas aseyu, tama augwali te sege side tau sabo po augwalibolo tolali.

Genuai Bidigo side nosali pedelaibao wali

(Daj 1-2)

1 ¹ Pol, me Sailas, Timoti, te dago te po dagebolo aseña tolobao. Dage Godigo po odama wali pabo we bidi, te dage Tesalonaika bulude bidibo we bidi dao. Dage dago Aya God me Genuai Bidi Jisas Krai sode wadolama bidibao. ² Aya God dali Jisas Krai Genuai Bidi augwali sigo dage olo tau selama, tama dage haliga nagame ilama bugagia bidao, dago homugo tebo dao.

Te Tesalonaika bage te seęę sabo sogo augwali bomu elama dolalu tulalusiąmainogo Polgo Godibolo gedu haluasa po weyu usu da wai

³Dago abagi dabe, sesemane sogo dago Godibolo usu da weyu, dago dagede homu kone palu gedu haluasa po wabo dao. Tama dago Godibolo nage usu da po wabo si, te usu si ebo dao. Magi basowe? God agai dage tau selama, tama dagego Jisasde po konealubo kolesaga mu genuai mu yai dao, tama dage deli deligo dwagi yai homu duga abagi dabe dali ebo dao, tama dagego te kolesaga ebo meę ela pabo dao. ⁴Tama tibaso, dago Godide dwagi yai homu ebo dao. Dagego te dwagi yai kolesaga ebo po dago odobaso, tama da gasa buluba biligi peyu, tama dago digi dagego ebo dwagi yai kolesaga te Godigo po wali pabo we bidi augwalibolo pusuyu, dago dagego nogi ugwaba sabo dao. Gasa bidi augwaligo dage dali dwai kolesaga eyu, tama augwaligo dage eleyu, tama dagebolo seęę mabo dao, te po dago gasa we bidibolo pusubo dao. Tama dago te po wabo dao, 'Te Tesalonaika we bidi augwaligo tigide seęę siyu dene sobadi digi, tama augwaligo bomu elama dolaluyu, konealubo po daę wabo dao,' dago te po gasa we bidi dali weyu, dago dagego nogi ugwaba sabo dao.

God agai dago ebo kolesaga dolo osola subo dao

⁵Te dagego te ebo kolesagade God agai da hania tama ola mobao, agai dago ebo kolesaga osola subo si, tama agai dolo osola subo dao. Tama dagego te God agai we bidi tonalubo seę tobade te dene dali seęę dali si sai. Gasa bidi dabe augwaligo dagebolo dene dali seęę dali si mawai. Tama tibaso, God agai dage dali tama tiyu, tama dage agai we bidi hani tomode bidibo usu yaibao. ⁶God agai dolo kolesaga e tama yaibao. Agai dage dali te dwai seę yali boi bidi dali begelama wei siyu, augwalibolo dwai seę hauwa elama, tigi dene mawaibao. ⁷Tama agai dagego megi te tolobo seęę sela şanama, tama dage da dali olo bidiyu, toma tuabo sogo menama bidaibao. Agai tebo sogo Genuai Bidi Jisas aga boma pai ensel mobo bidi dabe dali dagalu tagalama, e tþba asobo te sogo aga moni sia bogoli dali e tþba asaibao, we bidigo bulu ulade hania sueibao, te aga asobo sogode. ⁸Tama tiwai aselama, tama te sogo God konebo hagela yali we bidi dali, Genuai Bidi Jisasgo po wali pişawani bidi dali augwalibolo agai dene mawaibao. ⁹Tama te bidi dabe augwali e tama dene saibao, augwali Genuai Bidi gesabidide digibulu bidaibao, tama agai genuai ula dali bomu dali digibulu bidada peyu, bidada paibao, tama tiyu augwali mu dwai bidaibao. ¹⁰Te we bidi dabe augwali te Jisas e tþba asobo side augwali te tiwai mu hagawaibao. Tama agai e tþba asobo sogode, agai doloba pai mu we bidi augwaligo aga nogi ugwaba mu saibao. Tama konealubo po Jisasde daę wali we bidi, augwali noma siyu, Jisas dali dwagi yai po waibao. Tama dago Godigo po dage tomode

pusulama, tama dagego konealubo po te pode daş obaso, te dagego me augwali dali Genuai Bidigo nogi te sogo ugwaba saibao.

**Polgo Tesalonaika bulu we bidi tau somainogo
Godibolo gedu haluasa po wai**

¹¹Te dago te Genuai Bidi aga ma asobo sogode homu eyu, tama tigidali sogo dago Godibolo gedu haluasa po dage tau somainogo wabo dao. Tama Godigo dage polobadu i walide, tama agai homugo dage aga wai puluba gagawaibao, agai te homu elama, i wai dao. Tama megi dago Godibolo usu da weyu gedu haluasa po agai dage tau siyu dage aga wai puluba mu gagawaibao. Dago Godibolo po e tama wabo dao, "God, te Tesalonaika we bidi augwaligo konealubo po nagede daş weyu, tama augwaligo homugo haniani şe te konealubo po daş wabo bidi dabego ebo şe tiwai yabo homu eyu, tama augwali dwagi yai we bidi nago gedude bidainogo tebo dao. Tama dago nagebolo po hanaluyu, nago augwali tau siyu, tama augwaligo te şe tigidali emainogo tama augwaligo te şe yabo homu tiwai," dago te tobage po wabo dao. ¹²Tama dagego te dwagi yai kolesaga ebode dago Genuai Bidi Jisasgo nogi dagego ugwaba saibao. Tama dago God dali Genuai Bidi Jisas Krais dali augwali sigo dwagi yai homu da dali eyu, da olo mu tau mabo homu kolesaga dwagi yai mu eyu, tama Jisasgo dagego nogi me ugwaba saibao.

Bomo yai po sela şabo bidi po

2 ¹Dago abagi dede, dago Genuai Bidi Jisas Krais aga ma asiyu, tama da aga dali deliba sisiniyu ebo, tebode megi dago dage tau sabo po elalubao.^a ²Bomo elama, dagebolo te po obao, bidi mego dagebolo te Genuai Bidi asabo bodolu te pedalai dao te po obaso, dagego te wabo po odolama, dage polo homu hauwa eyu, dage homu şeşegio. Bidi mego na eyu, Jisas ma asai dao po te bidigo odali bogo. Ma, bidi mego aga homugo digi te po waliwe? Ma, augwaligo, 'Woo, Pol agai te Jisas ma asai dao po pasde aşena tolai dao, dabolo,' tama me augwaligo waliwe? ³Jisas ma asobode augwaligo geda muani po dagego odamuo. Te Jisas ma asobo sogo olo dali tama polo pedalogobeo. Te menio. Te şe pedalainogo hasia bolo bidi hauwa augwaligo dwai şe hauwa elama, tama God nogi gegeda peyu, tudiba mu muaibao. Te bomo yai po sela şabo dwai şe ebo bidi hasia aga bolo dago gesabidiba pedalaibao. Te bidi Godigo te moni sia bulude nosali mu dola silaibao. ⁴Tama te bidi mu dwai bidi mu dao. Tode we bidi augwaligo haniani naibolo lotu po wabo dao. Tama te bidi agai te nai tigidali dali boi bidi elama, tama te bidi aga God tiwai mu yaibao. Tama te bidi aga digi aga nogi ugwaba mu siyu, te tigidali lotu

^a 2:1 1 Te 4:15-17

po wabo nai aiyaba elalu dolama, tama te bidi aga Godigo Moni Lotu Be tempel tomode bidiyu, tama agai po weyu te po waibao, “Ena digi ena God dao,” te bomo yai po sela şabo bidi agai te po waibao.^b

⁵Polobadu ena dage dali Tesalonaika bulude bidibadi yaide, eno dagebolo te şe nosali pedalaibao po wai dao. ⁶Tama te bomo yai po sela şabo bidi aga asobo tu palialubao. Tama te bidi aga Godigo bodolu mani sogo naga bulu ulaba hania pedalaibao, tama dagego te konebao. ⁷Megi te bomo yai po sela şabo kolesaga e tuđe geme dulalubo digi, aga şe ebo dao. Tama aga geme dulaluama, tama aga te tu palialuali bidi bogia soabo tonalubao. ⁸Tama te tu palialuali bidi bogia solama, tama te sogo naga te bomo yai po sela şabo bidi hania bulu ulaba pedalaibao. Tama Genuai Bidi Jisas nosali asama, tama agai te bidi agai po wabo mobogo ela muaibao. Tama Genuai Bidi Jisas aga bomo dali ula dali hania pedalama, asaibao. Tama agai te bomo yai ulago te bomo yai po sela şawani bidi mu dolaibao.^c ⁹Tiali goli te bidi pedalama, Jisasgo aga ela musişbadi, te bidi agai Satango genuai bomo selama, tama agai tigidali me me bomai şe me, bidigo isişwai şe me, bidigo noma sabo tibo şe me, te şe tigidali te bomo yai po sela şabo bidigo te sogo yaibao.^d ¹⁰Tama agai tigidali ili po wabo dwai kolesaga eyu, agai te hagayabo tuđu pabo bidi dabe dali tibo po waibao. Tama te bidi dabe augwaligo te Godigo mu po dago odaio homu egi sogo da, teda God agai augwali ma sigi da. Tiali goli augwaligo te Godigo mu po odobo hagela yai. ¹¹Tama tibaso, Godigo augwaligo homu pesegelaibao, tama augwaligo te tibo po wabo mu po dao omainogo yaibao. ¹²Tama elama, Godigo mu po augwaligo homude daş wasişyu, tama dwai şe ebo kolesagade dwagi yai homu mu yai we bidi tigidali augwali Godigo po tuđe şeşe mu saibao.

Godigo dage sa muyu, dage ma saibao

¹³⁻¹⁴Tiali ma, eno abagi dede, megi dage te tobage we bidi menio. Genuai Bidigo dagebolo dwagi yai homu eyu, dage godolo mu ebo dao. Polobadu mu God agai dage sa muyu, dage ma saibao wai. Tama Godigo Mobo Bidi agai dage habu seliyu, ‘Godigo hani dao’ wai. God agai homugo dago Genuai Bidi Jisas Kraisi agai genuai ula dali bomo dali agai dage dali nosali dobawaibao. Tama te homu eyu, agai dage i wali, dago agai gesi dwagi yai po dagebolo pusali sogo. Tama dagego te mu po dao wai dao, tama God dali, dage dali sigo te tebo kolesagade Godigo dage ma sai. Tama tibaso, sesemane sogo dago gedu haluasa po weyu, dago Godibolo buba hwi weyu nage usu dao po wabo dao. ¹⁵Abagi dede, God agai dagebolo te dwagi yai şe ebaso, dage bomo elama, dago dagebolo pusali po me, pasde aşani po me, te po tigidali mu daş olama, tama bugagia bidao.

^b 2:4 Dan 11:36; Ese 28:2 ^c 2:8 Ais 11:4 ^d 2:9 Mat 24:24

16-17Te dago Aya God agai da dali dwagi yai homu eyu, da godolo mu ebo dao. Tama tiyu, agai da olo mu tau siyu, dago homu kolesaga dwagi yai eyu, sesemane sogo bidada paibao. Tama agai da olo mu tau siyu, tama Godigo da nosali bugagia bidimainogo yaibao, da tonaluyu bidibo dao. Tama dago homugo dago Aya God dali, dago Genuai Bidi Jisas Kraisi dali, augwali sigo dagego homu kolesaga bomo daŋ walomainao, tama dage tau sao, dagego tigidali dwagi yai kolesaga eyu, tama dwagi yai po naga omainogo yao. Dago homugo tama timainogo ebao, tama tibaso dago gedu haluasa po obao.

Tesalonaika hani bage augwaligo te se ebo hagela ebo bidi dabe dodolobo kolesagade po wali

(Daŋ 3)

Dagego Godibolo gedu haluasa po da tau somainogo wao

3 ¹Abagi dedeo, dago po me deli elalubuo. Te po e dao, dagego Godibolo gedu haluasa po da tau somainogo wao. Tama God agai da tau selama, tama dago Genuai Bidi Jisasgo po te tigidali buluba polo sela pelama, we bidi hauwa augwaligo te po odama, tama Genuai Bidigo nogi genuai emainao. Te pogo dage tomode se polo yali tiwai gilama gasa bulude emainogo, dagego Godibolo po hanalu wao. ²Dagego koneai, bidi hauwa augwaligo Godigo dwagi yai po odoyu, homude daŋ wabeo. Tama tibaso, te tobage mu dwai se ebo bidi dabe augwaligo da Godigo po sela pabo bidi dali dwai se idali weyu, dagego te seŋde me Godibolo gedu haluasa po wao.

³Awe, we bidi mebago dwagi yai kolesaga mu ebo menio. Tialima, Genuai Bidi Jisas agai da dali dwagi yai kolesaga naga mu ebo dao. Tama tibaso, da we bidi agade homu daŋ olama bidibaso, te usu yaibao. Agai dage bomo menama, tama dage tonaluyu, tama dwai haubo bidi Satan agai dage dali dwai kolesaga me egobeo. ⁴Tama me, Genuai Bidigo da ola menama, tama dago dagede te konebao, tigidali kolesaga dago dagebolo yao te po wali, te se dagego megi me ebo dao, tama nosali me dagego tama naga tiwai se yaibao. ⁵Dago homugo Genuai Bidi Jisasgo dagego homu kolesaga dodolomainogo yai. Tama agai te se dage dali eyu, tama dagego Godigo dage dali dwagi yai homu eyu, godolo mu ebo se page mu koneaibao. Tama agai dagego homu kolesaga dodolama, tama Kraisi agai moni seŋe tolaluyu, aga bomo elama dolaluali se page dagego te me mu koneaibao. Tama koneama, dagego te se tiwai gilama eyu bidao. Dago dage dali te homu eyu, dago Godibolo gedu haluasa po wabo dao.

Godigo po wali pabo we bidi tigidali augwaligo se yao wai

⁶Abagi dede, dago Genuai Bidi Jisas Kraisgo nogide, dago po bomu elama, dagebolo obao, dagego suali abagi agai tubo nai sabo se ebo

hagelayu, olo bidiyu, tama agai dagego dade sali po wali pişabaso da, dagego te tobage bidi sula tagalao. ⁷Polobadu da dage dali bidibadi, tama da olo bidai menio. Tama dagego koneai, dagego dago yali kolesaga tiwai gilama tama dagego tama tiao. ⁸Tama da dage dali bidibadi dago dagego nogode tubo nai olo me sabe. Menio. Dago abeleyu naga yai. Dago şe bomo elama, tama siade me hulide me te şe dene hauwa mu eyu, tama dago dagebolo naga şeşe maidali weyu tiwai dao, dage habuge idali weyu. ⁹Da da, dagego tubo nai masiabo bidi menio. Da da, dagego po ola mabo bidi dabe dao. Tama tibaso, dago dagego nai olo sobaso, te usugi da. Tiali goli, te menio. Dago te tubo nai sabo şe ebo dagego suali. Tama dagego dago yali kolesaga wali pomainogo te şe dago yai dao. ¹⁰Polobadu da dage dali bidibadi, tama dago e bomo yai po dagebolo maiyu tama wai, niwai bidi şe ebo hagelabo homu eyu şe isişwani te bidibolo tubo nai magio.

¹¹Magi baso dago te po waliwe? Dago odali, dage tomode bidi meba tubo nai sabo şe isişma olo bidibo po dago odalio. Augwaligo şe me ebo menio, tigidali sogo. Augwali olo biliyu, gasa we bidigo ebo şe suyu, tama augwaligo te po ola bilibo dao. Tama dago augwaligo te dwai şe ebo po odama, tama dago dagebolo te nai magio po ma obao.

¹²Te Genuai Bidi Jisas Kraiş agai nogigo bomogo dago te tobage şe ebo bidi dabe augwalibolo po mobo mayu, bomo elama te po obao, augwali nagame elama, bugagia bidiyu, şe eyu, tama augwa digi nai sela tumainogo yao.

¹³Eno abagi dede, dage dwagi yai şe ebo bage, dagego dolo dwagi yai kolesaga ebo hagela egimio. ¹⁴Tama niwai bidi me deligo dago megi aşena tolali po tigidali wali pişabaso da, te bidi dagego sulama, koneao. Tama dage te bidigo ebo kolesaga sulama, sula tagalao, digibulu bidao. Tama aga yali dwai kolesagade hale emainao, aga homu begelemainogo tama tiao. ¹⁵Tiali ma, dagego homugo aga dali boi bidi yabo homu egimio. Te menio. Dagego homugo dago abagi dao te homu elama, tama dagego agabolo po mobo ola mao.

Po silagasu wabo po

¹⁶Te Genuai Bidi Jisas aga dwagi yai homu nagame ebo page bidi mu dao. Tama dago homugo sesemane sogo aga digi dage dali bidiyu, tama dage dwagi yai homu nagame emainogo yao. Tama dago homugo haniani şe dagebolo pedalubaso da, teda agai dage dwagi yai homu nagame emainogo yao.

¹⁷Ena Pol ena digi eno te po dage tao olama, aşebao. Te eno tigidali pas aşebo silagasu, eno tama po naga aşebo dao.

¹⁸Eno homugo Genuai Bidi Jisas Kraiş agai da olo mu tau sabo dwagi yai kolesaga dage tigidali dali bidao. Te tama dao.